

吳門邵步青先生輯

四  
山  
二  
水  
八  
卦

震澤莊元植署



粵自神農氏使岐伯嘗味草木典醫療病而經方本草之書由是咸出靈樞素問而下載籍實繁各有所主亦各有所偏洎仲景張氏出而經傳金匱論著傷寒接經辨證處劑立方誠如所謂有是病卽有是方非是方不能起是病洵可獻諸軒后之延而爲靈經羽翼其於後之學者不啻闢盡荆榛有坦途已乃世之言醫者習於溫補則訾議河間狃於攻下則菲薄景岳要皆咫聞淺見一孔自矜而於張氏之書曾未探賾索隱安能確見診氣所由來審察經脉所由受以處方施治毋惑乎醫理日晦而醫術日拙也吳門邵先生步青繼葉天士薛理

一瓢而起力學稽古循途守轍明辨傷寒四時變證專  
宗長沙恪守心法而於諸賢之說亦復博采兼收成四  
時病機十四卷溫毒病論一卷女科歌訣六卷說理淵  
深辨証精細闡張氏遺蘊以津逮後人故當其身手到  
病除蔚爲良醫子若孫能讀其書繼繩勿替至曾孫杏  
泉名尤噪於大江以南今杏泉哲嗣少泉以少尉需次  
來皖亦能世其學敬奉遺編問序於余余聞北齊徐之  
才五世祖仲融以醫術顯孫子相承五傳至之才而益  
著步青先生以逮少泉世數亦正符矣尙其善承家學  
以光先緒而永其傳勿俾之才專美於前也可

光緒四年歲次戊寅日長至長白裕祿書於皖江節署



南京中医药大学图书馆版权所有

邵少泉少尉刊其先世所遺醫論若干種乞敘於余余愧非知醫者然其言洞達覽之心開目明三吳故多良醫儒者治經之暇日恆推究五運六氣之奧發揮四聖之術故其業與六籍同精步青先生出一瓢居士門下著述垂世四傳至文學君杏泉復能通其繁變纂述成篇活人之功藉藉人口而少泉以一諸生來皖候官復世其學有所治輒應手愈大都醫有專家惟讀書好古者足以洞明陰陽正變扶植性命俾民無夭札非小道也余旣嘉少泉克守樞書不墜端緒而又喜吳趨醫道之傳永永弗替使病者有所託命遂樂書其簡端

光緒六年庚辰孟春清苑傅慶貽序



南京中医药大学图书馆版权所有  
1661

四時病機十四卷、溫毒病論一卷、女科歌訣六卷、吳門

邵步青氏著。予竊聞之，三折肱而爲良醫。又曰：士君子不爲良相必爲良醫，甚矣。醫之爲學甚深，而爲功甚鉅也。夫五運六氣不無偏至，則有札瘥疾厲。飲食男女，不無過失，則有寒熱虛癆。人身一小天地，故醫理淵深，與大易鴻範相表裏。推而求之，治天下國家之術胥在於是。陰陽者，君子小人之辨；涼燠者，防微杜漸之機；補瀉者，興利除弊之用；診視者，開物成務之精。予於學醫得爲政焉。邵氏之學，旣世又生葉天士、薛一瓢之後，淵源有自。辨證深細，而不立異處；方中正，而不偏畸。可以教

授後來補救民疾則爲功與相業等抑予思之元氣流  
行如水在地正氣之與客感有中外之別人生自強四  
體完固天君泰然無病之福固不多得一旦有病惟有  
自量正氣之強弱抑太過而助不及客感自不能乘間  
隙而入若以感熱而握冰感寒而抱火不用志於內而  
用志於外吾恐已感之寒熱未去而凜冽與焦灼別受  
其害有本病有受藥之病誰爲名相吾願得三折肱之  
醫以導之論邵氏書附申此指有心世道者或不河漢  
斯言

光緒紀元立秋後五日雲龍舊衲紹誠識

醫理甚深非好學深思不能通其意戊寅春邵少泉少  
尉出其先人所著書相示余夙不知醫何敢妄加末議  
然觀諸序知其淵源有自於此道固已三折肱矣略識  
數言以誌景仰潞河胡玉坦識

昔范希文未達時，詣相士曰：吾可爲宰相否？未對。復問曰：然則可爲名醫乎？相士曰：嘻！君之志何前倨而後卑也？公曰：不然。惟宰相可以拯天下，亦惟名醫可以利天下。吾故願爲之也。袁了凡未弱冠，家貧棄舉業以習醫。每語人曰：習一藝以成名，而可以利天下者，惟醫爲然。二君子後皆功昭史冊，卓古超今，而當其未達，乃皆欲以醫術利天下，則是醫之爲功也，洵不在治國平天下之後。邵君步青、薛徵君一瓢之高足，乾嘉間以醫名於吳，著有《四時病機》十四卷，《溫毒病論》一卷，《女科歌訣》六卷。戊寅予觀察皖城，其元孫少泉少尉出其書而問序。

於予予夙非知醫者雖未敢貿然置喙以遺笑於方家而邵君之志則可知也夫醫之爲用也大而能普而其爲理也微而難通以東垣之精深猶不免偏於溫補河間之博奧且失之過於寒涼當時議者已皆有遺害之譏迨後人祖其說而不得其意害遂滋甚無惑乎今之日操殺人術而不自知其非也邵君獨取溫濕暑瘧瘧毒胎產等症闡陰陽之理明寒燠之分薈萃諸家以折衷於素靈金匱而力矯其偏故其取材也博而賅其立論也正而當其用意也神而明後之學者得其意而變化之豈復有模棱之患吾故曰邵君之志可知也其

志云何殆猶希文之間相予凡之擇藝異代而同心也  
後世其有興乎今少泉以諸生官於皖亦本家學精於  
醫吾知其他日民社躬膺必將移所以利疾病者利斯  
民也少泉勉乎哉

光緒戊寅孟夏長白覺羅成允序

內陽外陰爲泰、內陰外陽爲否、扶陽燮陰、中正當位、而  
不偏此易義也。治天下然卽治病亦然。邵君獨取溫濕  
暑瘧，析爲四時病機十四卷，又專取溫疫證治爲溫毒  
病論一卷，別取經帶胎產詳言之爲女科歌訣六卷。是  
何故哉？蓋濁陰之氣中人深，發病驟。小人害君子，漸漬  
浸潤，一發而禍烈。其機如此，故一切內外雜病雖多不  
言，獨言此數者，而預防之而救治之也。陰陽和而後萬  
物資生，婦女純陰，嫌於無陽，施治爲尤難，故別爲專科  
焉。邵君深於醫，蓋深於易矣。愚醫多不通素靈，金匱傷  
寒之書，黠者假經語以爲緣飾，莫能發其精微，抑且淆

亂之劉河間俑立暑火之論專用寒涼本爲北方地氣而設流傳失其本意爲害已甚李東垣稍知醫謂脾胃火務溫養而朱丹溪乃立陰虛火動之說輒訾陽藥於是寒涼之弊又復盛行不操刀而殺人張景岳注本草獨詳參附之用所著類經其方陣之目雖鄙其用意可嘉也然景岳偏於溫補蓋方入而閉門火方灼而厝薪誤人十常八九與河間丹溪厥過維均此則偏之爲害而中正當位之難也凡治病必先固元氣元氣者陽氣易所謂元者善之長也陽主通汗吐下所以通易所謂亨也亢則害承乃制火劑白虎所以和易所謂利也用

陰輔陽非以陰伐陽而貞元相續矣然則扶陽自有法  
在非一於溫補而已燮陰亦自有法在非一於寒涼而  
已邵君之書專爲溫濕暑瘧及女科立論其源蓋本諸  
素靈金匱而參以後世醫士之言既明且備余非知醫  
者姑著平昔之所聞如此而心折於君之能通醫於易  
也君諱登瀛字步青元和縣人此三書凡十九卷曾孫  
文學君炳揚杏泉所述元孫少尉景堯少泉所校君醫  
學傳家已五世矣少泉能文章爲名諸生而官於皖旣  
淵源家學又將推之治術斷至當位而不偏不獨蘇枯  
起瘠已也少泉勉之哉

同治甲戌九月庚子朔京江劉傳祺序



南京中医药大学图书馆版权所有  
1954

吾蘇邵氏代有名醫卽現來候補之邵少泉少尉亦名  
噪一時惜其舍醫而爲折腰吏也讀其先人所著醫書  
三種部居別白慘淡經營是爲必傳之書敬注數語以  
志佩忱甲戌二月同里陸迺普謹識